

本朝分省人物考

人物考卷之一百十一目錄

廣東廣州府二

黃皞

陳希文

冼光

黃衷

倫文敘

王縝

蘇葵

方獻夫

附子藻

湛若水

陳錫

黃重

霍韜

附子與琬

鍾善經

梁焯

倫以訓

倫以諒

鍾雲瑞

王漸達

黃佐

黎貫

祁敕

王鳳靈

何鰲

張潔

陳騏

劉士奇

何宏

鍾曉

方重杰

附子夢升

林挺春

梁廷振

附李祥

何維栢

侯國治

龐尚鵬

龐嵩

梁有譽

陳紹儒

蕭端蒙

黎民表

趙勳

羅虞臣

郭棐

歐大任

雲奇

唐豫

附子肇

黎貞

李孔脩

陳鶴

李義壯

何繼之

岑萬

戴銑

林烈

梁津

李鳳

唐守勳

李 价

李邦義

岑用賓

梁 典

劉 格

李 悅

附李翔

嚴 竦

謝 佑

何廷矩

霍 任

附弟傑

鍾景星

鄭 昊

劉克正

梁有年

區 越

殷廷蘭

目錄終

本朝京省人物考卷之三百十一

廣東廣州府二

黃 皞

黃皞字時雍號櫟坡南海人年二十六領成化乙酉鄉薦卒業太學益博綜羣籍以書授徒凡得其旨要者卒爲名士然屢屈於禮闈始謁選天曹太宰置其文第一授吏部司務陞司封員外郎時東廠權燄特曹署請謁必踞歲暮饋曆次當往比見長揖而已總兵沐崑請嗣黔國公皞按其世宜襲西平侯執奏至再朝廷以舊恩遠鎮特與世公爵故事子通朝籍

父爲外小吏雖以罪廢猶冒貶封皞奏革之由是士人始知恩典之重尋拜江西左叅議奉制督儲入辭冢宰屠公屠曰江西大藩錢穀弊集是以付卿皞對曰往服厥官安敢不力如後有謂皞才智弗給卽皆可信若謂其貪幸見察耳屠曰嘻豈有是哉至則摧豪惠良去積蠹如振秋槁郡縣糧目素繁且雜若完若負不稽簿領肆口指陳無一棼謬又妙通算法目量贏縮不假籌計奸吏屏伏糧政大修寧庶人蓄異志禮多僭擬庶僚朝見類贊叩頭皞伏不動俟贊畢而興識者以爲得體祿米折價溢數而橫取皞執不

司庶人大怒遣儀賓李某動以危言曰殿下且奏奏  
下卽布政通判輩斬矣皞徐曰第斬吾一人足矣何  
冤彼邪其議竟沮至如辯豪僧之誣訟遏兌運之侵  
暴上下避焉居八年撫臺林公見素薦之巡察若喬  
若周若王薦之以無內援未果遷值逆瑾亂政裁奉  
制官皞在裁列士民攀泣欲疏乞畱皞輕舟徑去旣  
而江西糧務日弊朝議以舊職起皞復領其事未至  
擢雲南左叅政所管納樓茶甸長官死妻沙福代與  
夫弟普顯治兵相攻積數年死者甚衆撫鎮屢遣屬  
僚撫諭竟莫能平皞曰非藩臬重職恐未有濟乃偕



僉司都閫以往比至境福顯皆盛兵自備皐若不聞也者據館卽召二渠反覆詰讓盡得其情乃執通把數輩將撻之操兵者望風奔潰皐度其已困釋之曰日暮且休矣遲明俱來吾有戒約詰旦二渠皆束身伏庭下聽命去居數月福等各行千金求變初約且曰已告夫二子者皐曰吾卽受此緣此以死者將不知幾千百人吾雖貧已老如子孫何謀者乃寢竟弭其亂初安南長官那代攻破蒙自虜其令祿卿之族負固垂二紀歷數守巡毋敢議者皐至則濬塹增陴調餼練兵建旗鼓申號令若將征之者代懼請歸祿

鄉之妻若其屬口乞緩師以圖新由是威震六詔璫  
崔安附瑾作威且忌其功語次微有譏犯皞盛氣力  
辯聲色俱厲安乃媿屈連呼鐵漢吏民因稱鐵漢公  
云比致仕垂橐而歸觀者泣歎謂三原公後無此廉  
節也雅善吟詠晚年屏居詩益雋永遺稿藏于家正  
德壬申卒享年七十有三

### 陳希文

陳希文字載道南海人成化癸卯舉于鄉乙丑令武  
清縣去京師百里道衝通運河民疲俗悍希文至視  
篆七日卽執勦舊家販私鹽及開市于河西務者數

人治之凡利於民次第舉行暮年大治邑舊無城池  
嘗苦響馬賊希文私書勳戚有田在邑者計田出貲  
功遂告成部使者交薦之拜太僕寺丞庚午領常盈  
庫銀二萬兩往大同買馬給散軍士兼閱帑得欺匿  
銀三萬以聞歸途遇劉六劉七之亂次定州城中驚  
駭士民擁入問計卽登城號召發公廩以給貧民守  
城者有無賴子陰與賊通希文擒斬以徇民遂堅守  
賊環攻三日知有備乃去至真定賊已抵近郊守官  
閉城遣人察識希文乃啓鑰希文按轡徐行驅民先  
入民得安堵尋奏覈真定等府寄庫養馬餘地銀乾

者治如律丙子出爲湖廣常德知府脩理河渠興振學校居三年述職如京解官歸卒年六十有五

### 洗光

洗光字汝實南海人始祖有鶴園徙居順德之鷺洲村光生而長身玉立讀書八行俱下舉弘治丙辰進士授江西安仁知縣潔已愛民善辯疑獄寔人子誣陷重辟歲久不白光一訊立釋之百姓爲之語曰民無冤訟有洗燈籠訟無滯屈有洗三日言其明且斷也水災民饑光發賑不俟請命存活甚衆縣有引鹽前官卒利其羨光藉以輸公遂爲成例時進諸生講

學勉以忠孝大義如大學士桂萼兄弟皆感教而興  
者丁父艱去補令泰興召爲陝西道御史出按應天  
獎廉察墨風裁大著臨江民某商于徽以誣繫獄幾  
瘦死光廉其冤爲讞出他郡平反多類此居臺七載  
疏毀佛像疏劉瑾專權疏江彬誘駕巡幸侃侃凡干  
萬言中外爲光危光不色動疏亦畱中光遂乞歸養  
母杜門十八年嘉靖戊子以薦起南京通叅歷太僕  
太常晉工部右侍郎所至皆有聲遇太廟災援例自  
陳爲時宰所忌竟准致仕光廉靖正直居官無紛華  
之好解組林下不通冠蓋日從父老徒步田間問樵

稼無有知其爲卿佐者卒後上遣官諭祭子堯相廕京府別駕孫應芳憲祖俱舉于鄉

### 黃衷

黃衷字子和南海人父璉居喪盡禮以學行稱士多從之遊衷幼穎絕倫三歲誦孝經問孝本天性何別於天子諸侯璉大異之弘治丙辰登進士授南京戶部主事監江北諸倉覈括積歲侵羨得粟十餘萬及督權楊州尋丁內艱時僅四十日輸銀九千三百餘兩卽前此一歲之入也起復除戶部晉員外郎惟外艱補南兵部晉禮部郎中歷轉兵吏二部與顧璘陳

沂輩以詩文擅名出知湖州府遷福建都轉運使晉  
廣西督糧叅政繩奸有法境內肅然時征古田帥師  
由落容斬首二千餘級增俸一階辛巳擢雲南右布  
政以征芒市功轉左尋擢右副都御史巡撫雲南薦  
賢黜貪安民禦盜清里役以節財力復條陳地方利  
病八事皆切機宜移鎮湖廣首劾巡守二人奸吏多  
望風解去脩沔陽州龍淵滄浪等隄士民立碑以紀  
之數月積粟八十餘萬石銀四萬餘兩特詔嘉獎丙  
戌以討賊功再蒙褒賚晉工部右侍郎改兵部右侍  
郎抵家累疏乞休不報會有忌之者竟以誣謾削秩

勸上疏自明衷曰事久當白何辯爲久之果詔復  
職致仕卒年八十所著有矩洲文集十卷詩集十卷  
奏議十卷海語一卷行于世

### 倫文敘

倫文敘字伯疇長身玉立頭顱大二尺許五歲時與  
羣兒戲有術者獨指之曰是兒當大魁天下弘治己  
酉以儒士小試御史周南得其卷於遺才中嗟異之  
入棘闈果中高等己未會試殿試皆第一授翰林修  
撰學行才器爲世所推重乙丑武宗登極使頒朔  
安南會丁外艱不果庚午起復爲經筵講官尋超右



春坊右諭德壬申進講舜有臣五人而天下治多見  
諷語癸酉進修玉牒是秋主應天試事竣卒于京師  
年四十有七文敘天性純厚篤于孝友仗義恤孤室  
無私財且器量甚弘人皆期爲台輔及卒天下惜之  
所爲文宗韓楊悠長宛轉類其爲人居嘗以書史自  
娛手不釋卷尤善教子三子以諒以訓以誨皆成進  
士而以諒鄉試第一以訓會試第一廷試第二父子  
居四元海內科名無兩云

王 縝

王縝字文哲東莞人父恪寶慶知府縝爲人敦重寡

言笑弘治癸丑進士爲翰林院庶吉士授兵科給事中出使安南其國王郊迎席拜以氍卓叱去之所餽金寶一無所受進禮科右給事中奉勅清查南畿屯田革宿弊擢工科都給事中正德初擢山西左叅政遇例裁革改雲南左叅政時逆瑾擅權牽咎罰米五百石俸不足鬻產以償瑾誅進右布政使俄進福建左布政使遂陟都察院右副都御史奉勅巡撫應天蘇松嘉杭等郡兼督糧儲殲逆賊劉七於狼山禦姚峒賊王浩八於徽寧獲賜鈔幣隨以乾清宮災警上陳言以答譴四事曰正大本以安天下省內臣以慰

民望處驛遞以蘇民困廣延納以開壅蔽皆切時弊  
武宗西巡疏止之不報歲壬申丁內艱服闋以父年  
老乞終養勅起撫治鄖陽至任時 武宗巡幸諸郡  
供億動以萬計有求活虎豹以獻悉令罷之且究其  
爲首者襄府護衛奪民產爲疏辯以還民已卯夏寧  
藩煽亂震擾荆襄縝下令設守備嚴警柝士氣振奮  
人心獲安擢南京刑部右侍郎嘉靖紀元隨上疏陳  
十事曰正心以正大本勤政以法祖德親賢以廣延  
訪守信以重詔令崇德以禁奢侈舉知以求賢才體  
仁以恤民窮修禮以正風俗裁冗員以復舊制慎刑

罰以重人命多見採納陞南京戶部尚書疏以父年老辭不允時南畿大饑縝區處賑恤請內帑銀五萬給之尋卒於官年六十有一訃聞上命賜祭葬

蘇葵

蘇葵字伯誠順德之龍頭人進士入翰林爲庶吉士授編修弘治丙辰次當同考會試柄臣屬其私人葵堅却之遂謝試事被讒出爲江西僉事提督學政公明士子服焉鎮守太監董讓作威縉紳奪氣葵守正不能詭媚讓誣奏葵遣法司盛洪等臨治南昌洪欲誣葵諸生數百排闥入擁葵而去事竟得白增修白

鹿書院置學田改四川裝不能具其兄助之乃行四  
川士愛之如江西至福建右布政使卒正德辛未江  
西提學副使李夢陽請入白鹿洞先賢祠曰公昔省  
方視學衿佩作氣抗折權貴威武不屈茲洞之興公  
實有力德祀功祀二者公並有之

方獻夫

附子渠

方獻夫字叔賢南海人父遂以鄉薦署全州學正卒  
遺腹生獻夫七歲卽苦學不輟莊重如成人弘治甲  
子舉鄉試第二登乙丑進士選庶吉士歸養母終  
喪起復歷吏部文選員外郎正德中復謝病歸與湛

若水霍韜卜築西樵往來講學嘉靖癸未以薦起授  
考功員外郎會大禮議興廷臣惑於濮說獻夫上疏  
極言今日之事與濮議不同者三烏得牽合強附少  
師楊廷和見而惡之尋轉侍講學士敷陳洪範之義  
上皆嘉納之乙酉大禮書成擢少詹事丁亥轉禮  
部右侍郎 上以張寅獄久不白命桂萼攝刑部張  
璉攝都察院獻夫攝大理寺廷鞫之獄成 上欲誅  
御史馬錄及其黨四十人獻夫與璉等力救錄得謫  
戍餘皆末減 上又欲誅建昌侯張延齡密詢之對  
曰昔漢文誅薄昭致母不食今殺延齡必傷昭聖人

后心非盛德事也遂寢後夏言伺上意陰令董至等上變延齡始不免是冬遷吏部侍郎尋擢禮部尙書獻夫遂請毀畿內尼菴至六百餘區天下僧道無度牒者悉令還俗戊子明倫大典成加太子太保尋改吏部尙書陳言修省諸疏多見採納庚寅謝病南歸居無何復遣行人蔡愛徵還晉少保兼武英殿大學士賜金章曰忠誠直諒久之進光祿大夫柱國以病屢乞骸骨不許懇少傅李時爲請始許之治第西樵山麓優游十載而卒贈特進太保謚文襄平生厚於人倫解相後笞家奴忤其兄茂夫意輒置酒長跪

謝罪尤篤交誼友人陳激衷貧爲置田園以娛其老  
少時與王守仁同官吏部而折節相師士林多其謙  
遜年僅五十輒力辭樞筦其急流勇退尤近世所罕  
觀云所著有易經約說學解大學中庸二原西樵存  
稿子繁廕歷尙寶卿藻多智略精騎射歷贛州府同  
知有平寇功後至武定知府

### 湛若水

湛若水字元明廣東增城人性穎敏自少知學弘治  
壬子以書魁其倫尋從白沙先生遊卽以隨處體認  
天理爲宗白沙曰此子叅前倚衡之學也自是潛心



默會日有所得遂焚去路引誓不復仕後以母命出  
 僉事徐紘爲勸駕赴南雍祭酒章懋試粹面盎背論  
 甚奇之乙丑會試學士張元禎楊廷和主考撫其卷  
 曰此非白沙之徒不能爲拔第二名賜進士高等選  
 爲翰林庶吉士擢編修時陽明王公在吏部相與倡  
 道京師場屋所取士修謨呂柟主事王崇輩和之道  
 價日著學者稱甘泉先生久之使安南冊封國王黎  
 暉却其餽不受正德丁亥奉母喪歸葬荷塘廬墓三  
 年墓產瑞瓜人以爲孝感所致卜築西樵多士來學  
 支與日給錢米開禮舍于僧寺至齋戒三日習禮成

而後聽講講必端坐觀心不遽與言嘉靖初趨朝考九年滿陞侍讀尋陞南京國子監祭酒開講院與諸生論學刻心性圖說未滿考陞禮部侍郎先後有勤聖學等疏凡數十上總爲獻納編又倣大學衍義補作格物通以進累選南禮吏兵三部尚書置新泉三山二莊講學於新泉書院江都休寧貴池等處書院所在而是滿九年考吏部奏其績 上以年逾七十許致仕所著有遵道錄樵語古文小學四書測二禮經傳測春秋正傳古易經傳測學庸訓測前後詩文集不啻千百卷平生足跡所至必建書院祀白沙雖

田莊亦然嘗于所居天關精舍立祀先聖所置倉廩  
館穀多士又至衡山建白沙書院置田五頃歸復取  
白雲山爲白沙祠平生篤志而力勤無處不授徒無  
日不講學從遊者殆徧天下所論以自然爲本體以  
勿忘勿助爲工夫大抵得之師門爲多白沙嘗謂曰  
人與天地同體四時行百物生若滯在一處安能爲  
造化之主善學者常令此心在無物處便運得轉耳  
學以自然爲宗不可不理會又曰學以自然爲宗譬  
之適千里者起脚不差必有所到自然之樂乃真樂  
上下由間復有何事又示以詩曰有學無學有覺無

覺千金一瓠萬金一諾天命流行真機活潑水到渠  
成鳶飛魚躍德山莫杖臨濟莫喝萬化自然太虛何  
說繡羅一方金鍼誰掇其得于指授者如此庚申四  
月丁巳卒于所居小禺洞年九十五有大星隕于廣  
州之河南其聲如雷云

陳錫

陳錫字祐卿南海人弘治乙丑進士授戶部主事嘗  
司廐逆瑾方用事羣璫列中外雖東芻出納亦混主  
計錫以法繩之衆不敢肆司漕通州革弊政六條人  
以爲便轉員外郎調吏部稽勳尋陞郎中一時名流

咸所咨決屬舍人朱麒求襲封保國公錫駁之曰洪武之約非有重大軍功不得封爵襲蔭今朱麒襲公非約也宜從始封伯爵尚書楊一清從其議因著爲令正德丁丑遷福建叅政歷左布政綏定叛軍鈞稽乾沒樹立風紀綽有令聞擢應天府府尹去之日閩人爲立遺愛亭居應天未及三載廷議欲晉孤卿錫竟請致仕凡三疏得允優游田園以翰墨自娛凡十餘年始卒年八十有一賜祭葬郡人祀之鄉賢祠

黃重

黃重字子任南海人正德戊辰進士授行人懼外艱

歸服闋復職壬申使伊藩葬祭事竣卻其金帛鞍馬  
行至懷慶遣人馳投復卻之癸酉使遼東勞夷人却  
鎮巡例贈如使伊時甲戌以績最擢戶科給事中巡  
視內十庫并光祿寺宿弊俱革建言重名器久任用  
慎薦舉省推課四事戶部奏從所省商旅稱便已而  
清理畿內倉場權貴避焉時左都御史彭澤坐夷情  
削藉重奏請寬宥以昭往功輿論韙之尋進兵科右  
給事中考選京衛武官淑慝罔弗當者會 毅皇帝  
北巡迎駕有勞賜金幣遂疏乞歸省復賜寶鏐行庚  
辰復任尋罹內艱歸癸未服闋補吏科右給事中市

魁李陽鳳挾中官勢恣爲奸利方付刑部俄改錦衣  
獄尙書林俊執奏不聽乃疏慎政令以晷治安會災  
異修省復疏詔令不常爵賞太濫聽言不弘營建不  
節言甚剴切聞者危之甲申夏進兵科左給事中太  
監潘真出鎮荆湖違例丐請重封駁不避秋以言禮  
杖于午門外尋進戶科都給事中賜金幣寶鏹丙戌  
充武舉考官丁亥畿內饑疏請賑濟詔行其言多賴  
全活入侍經筵擢南京太常寺少卿比蒞事養牲厨  
役皆受其惠己丑星變以自陳致仕忌者快之公論  
惜焉時同年呂柟謫金陵嘗書喬岳大川氣象青天

白日襟懷以贈歸構草堂刻枿書以自況云平居希  
易諧諛然性嫉惡向義則勇奮不顧有姊適曾氏而  
貧每損貲贖還其產業同僚張漢卿落職貧甚瀕行  
傾囊賙焉鄉民有官責其逋課垂死者見卽爲之代  
償潘伯通等十人誣陷盜獄爲白其冤皆得釋他如  
革橫刷之舟築捍澇之牐鄉人頌德輒自遜謝其行  
誼類此巡撫錢如京疏請起用而已病卒年六十有  
二訃聞上遣官特賜諭祭

霍

韜

附子與瑕

霍韜字渭厓南海人生而重瞳甫就小學卽揭居處



恭三字于座前舉正德癸酉第二甲戌會試擢第一  
歸婚值江彬等橫恣遂隱西樵 世宗登極授兵部  
主事大禮議起廷臣主繼嗣之說韜上疏曰帝王相  
繼惟繼其統不繼其嗣自今言之 孝宗未嘗無嗣  
也無嗣者 武宗耳 興獻所出惟 陛下一人儻  
徇廷臣之議是使 孝宗有兩嗣 武宗竟無嗣  
興獻有嗣而不得嗣也一舉三失拂經不祥故惟統  
是繼兄終弟及則不惟孝宗之統不絕而 武宗之  
統亦不絕矣後卒如韜議嘉靖元年上三劄一論聖  
學治道一論六部政務一論中外積弊侃侃萬言時

以董賈比之癸未復謝病歸著書講學將終焉五召  
不赴丁亥擢少詹事兼侍讀學士兩疏懇辭惟詳陳  
用人之法上眷注彌切賜敬一箴洪範序及文獻  
通考于山中部檄諸司趣行首薦王瓊魏校王守仁  
等三十餘人轉詹事兼學士上法祖十二條江西提  
學徐一鳴毀寺散僧爲鎮守內官誣逮詔獄韜力救  
獲免戊子進禮部侍郎尋擢尚書俱累辭不拜錦衣  
韜能遷結巨璫崔文誣訐大臣韜表其罪狀減死謫  
戍韜雖遜處散地方朝廷有大議輒建白數千言多  
採用己丑春星變風霾韜疏陳召災變者六曰宗室

失所曰邊軍困苦曰冗官擾民曰賊吏害民曰酷吏肆虐曰內臣貪暴 上嘉納之詔自今官吏犯枉法賊者謫戍無赦酷刑殺人者因公亦黜著爲令上命主會試唐順之羅洪先輩皆所取士尋充脩大明會典副總裁因疏言田土失額文武冗濫且請覈內官員數屬之禮曹此屬人人自危遂中沮之庚寅郊祀議興給事夏言首倡分祀韜持論過激 上震怒下獄會天晝晦武庫兵器動 上警悟復其官俄以憂去癸巳召爲吏部侍郎廣詢博訪多所鑒拔乙未莊肅皇后崩詔廷臣議謚希之曰以四字請韜曰

帝后謚用十二字歷朝制也 武宗謚號旣循舊典  
則莊肅豈宜有異 上不悅卻其議久之尚書汪鉉  
罷代秉銓衡痛革宿弊選法一新無敢干以私者甫  
十月出爲南京禮部尚書至則申禮制正風俗毀淫  
祠興社學清尼娼南都由之改觀侍郎崔銑嘆曰霍  
公可謂真宗伯矣己亥冊立東宮太宰許瓚薦韜剛  
正不阿忠直有識宜宮僚徵拜太子少保禮部尚書  
掌詹事府事時九廟七陵工費靡極公卿臺諫結舌  
乃與諭德鄒守益上聖功圖以諷 上怒詰責尋察  
其忠懇原之復有南巡之議有司科斂遐邇洶洶韜

疏陳其狀事遂寢旣而權貴結術士謀導上退休  
以東宮監國冀爲奸利韜力諫止之前後所上幾三  
十萬言直聲震天下庚子冬卒于官贈太子太保謚  
文敏韜爲人質直好古行誼高潔學崇莊敬不喜浮  
談平生肆力于居處恭卽獻納亦以此爲第一義尤  
好進賢汲汲如不及康海李夢陽王九思輩坐累禁  
錮猶屢薦之嘗移文峽山而虎害絕燬峽江祠而妖  
患息其精神感格類此秩滿敘廕舍子而官宗子與  
球積俸置產與從兄弟共之尤人所難云所著有詩  
經解註象山學辨程朱訓釋霍氏家訓渭厓集西漢

書纂評行于世學者稱渭厓先生長子與璞穎悟過人年十五註楚詞蚤卒與瑕與璵與瑋並舉于鄉而與瑕登嘉靖己未進士授慈谿知縣時邑罹倭禍遐邇蕭條與瑕筮仕之初續父家聲振以明敏政行令肅豪猾斂手慈民甚德之御史袁淳受權貴指以列白簡民赴闕訴畱不得歸臥西樵者六年隆慶戊辰用給事中張鹵等薦召補鄞令俄遷南太僕丞轉兵部員外郎尋出爲廣西僉事飭兵左江土酋黃金彪叛督府議進討與瑕以計縛致又撫八寨城新寧州俱有功會憂去御史唐鍊劾調簡時兵部尙書譚綸

重其才爲除江西饑憲踰年復爲御史張簡所劾與  
瑕嘆曰吾安能隨時俯仰視人眉睫乎遂拂衣歸二  
十餘年卒所著有勉齋集慈人祀諸名宦云

### 鍾善經

鍾善經字理夫順德之都粘人天性孝謹不言而躬  
行居父母喪皆不進鹽酪者百日終三年未嘗御酒  
肉雖盛暑必服衰而半武不出倚廬祭葬無少踰禮  
者創建家廟出自已貲長姊早喪育二甥女如已女  
擇壻厚嫁之弟善綸先歿撫卹其孤寡同居共爨內  
外無間言少篤志問學以明周易補縣學生正德丁

卯領解額高等辛未登進士授福建興化府推官守法慎刑每讞疑獄部使者驚以爲老吏不如興化士大夫亡不譽其賢能者假官楊日新勢張甚察案尊禮之至則詰以數語不能對卽縛送臬司按治如律總鎮崔太監使一指揮往鎖府吏竟叱去之崔怒欲求事中傷不可得及相見反屈服焉其發姦擿伏不畏強禦多此類被徵爲御史差往盧溝橋抽分竹木廠實授福建道監察御史會武皇帝北狩力諫回鑾嘗劾奏錦衣千戶陶淳不法又彈太監崔文芮景賢以風力聞京師居無何卽上疏乞歸屏居杜門有



司屢勸駕不起督撫巡院交章以學行薦於朝未召而卒卒之日貧不能斂當道競周其喪弔者如市郡縣諸生以其行白于督學督學曰賢如鍾御史固當尸而祝之也今祀于府學仰高祠

梁焯

梁焯字日孚南海人正德甲戌進士過贛從王守仁學辨問居敬窮理悚然有悟拜禮部主事已卯三月議南巡與葉龍等十七人上疏諫上怒罰跪五日大杖三十車駕遂行會佛朗機夷加必丹末等三十人入貢江彬領四家兵馬從上遊豫導引火者亞

三謁 上喜而畱之比至京師入四夷館不跪焯朝  
問杖之又番人寫亦虎先與其甥米黑兒馬黑麻以  
貢獻事誣陷文武甘肅大臣時彬與錢寧用事二夷  
人者日益驕橫而大臣被誣者皆桎梏幽囚以是輕  
侮朝官焯每以法約束之二夷人相謂曰 天顏可  
卽主事乃顧不可卽耶彬聞之謂焯凌虐駕下人員  
將奏聞會 武宗晏駕是日皇太后懿旨誅彬已而  
火者亞三等與寫亦虎先皆伏誅以焯嘗諫被杖陞  
俸一級嘉靖初政司職方予告歸養卒

倫以訓

倫以訓字彥式廣東南海人也文敘仲子少有異質  
書過目不忘課對輒出奇語稍長博通經史年十六  
舉鄉試第六正德丁丑會試第一廷試第二授編修  
予告歸娶遂侍養七年始出乙丑實錄成進脩撰同  
考會試者二充經筵講官儀度雍雅詞義懇到左右  
傾聽 皇上時屬目焉以考績進諭德甲午主應天  
鄉試所舉皆名士丙申陞南祭酒立教嚴整士類歸  
心時太恭人就養思歸遂上疏乞養庚子遭疾卒得  
四十八嚮用方殷不竟其志所著有國朝彞憲二十  
卷及詩文集若干卷藏于家

倫以諒

倫以諒字彥周狀元文敘長子丰神秀雅世比之衛玠正德丙子舉鄉試第一越五年登進士第選翰林庶吉士秉軸者忌其才名出爲山西道御史未幾歸養數年言官交薦起補浙江道疏舉尚書林俊諸耆英輿論多之改吏部文選主事歷稽勳郎中久之出爲南京通政司叅議復謝病歸尋丁母憂遂無復用世志與主事王漸達最相得偕遊名山詩酒自適一時縉紳遜其豪爽卒年六十五以諒性孝友弟以訓宦遊歸無居第輒讓舍居之親族待舉火者甚衆然

未嘗德色人以此多之

### 鍾雲瑞

鍾雲瑞字天慶東莞人溫粹執禮潛心書史終日不下几榻親喪與伯兄雲祥廬墓鄉黨稱孝正德丁丑第進士授南京大理評事折獄平恕調北寺副歷寺正會世廟大禮諍之忤旨廷杖瘡甚得不死出爲江西按察僉事秉正執法伸理冤抑不避豪右尋轉叅議撫院惡之及謁有諂言雲瑞曰是豈待藩司禮耶竟不謝出撫院怒以飛語改調歸居西廬爲終焉之計三年部檄催赴選補雲南丁內艱服闋補湖廣

提督泰和山時中貴部隸恣橫雲瑞繩以法中貴欲  
中傷之無由益重之歲時餽遺拒不受未幾遷副使  
遂謝病歸閉門危坐雖子弟未嘗見其惰容表正鄉  
閭有陳太丘風時循寇連歲流劫雲瑞糾衆防禦寇  
知有備引去鄉人德之建祠以祀邑令楊寅秋額其  
堂曰慕德又爲之記隆慶庚午祀鄉賢從子卿最著

### 王漸達

王漸達字用儀番禺人父傳爲泰州學政祿俸悉以  
濟貧比卒室如懸磬母謂漸達曰貧至此兒欲以讀  
書佐食何異藝石田濟枵也漸達泣曰兒力不任農

圃巧不任工商惟劬學足代耕耳乃苦志鑽研弱冠登正德丁丑進士授刑部主事未幾請告侍養以臺首薦起刑曹條陳四事言極剴切人皆危之而書畱中不報再疏乞歸與銀臺叅議倫以諒相得甚懽爲物外之遊諸名勝無不足跡達登第三十年貧如故以諒歲周之尚書霍韜亦重其爲人嘗曰予平生莫逆交惟王用儀梁日孚耳漸逵多著述有水記正學記四書通言學庸釋略讀經記春秋集傳嶺南耆彥傳王氏宗禮青蘿集行于世隆慶初卹建言諸臣贈漸逵光祿少卿子原相登進士歷江西按察使

黃佐

黃佐字才伯泰泉其號也廣東之香山人正德庚辰進士歷官翰林宮詹侍讀學士卒贈禮部右侍郎謚文裕所著書二十二種平生服膺博約之訓慎獨而力于行其操觚命謨爾雅名家理學之士率墮理窟萎薶腐迂而獨不然蓋理學而兼辭藻者本朝如佐不幾見也其五七言近體雄深麗逸旨遠格精足以入室王楊升堂李杜至于賦樂府古詩兼總古今旁通音調端方入矩圓融出規殆憑軾而馳漢魏結轡以取風騷也



黎貫

黎貫字一卿南海人正德丁卯舉于鄉辛未始計偕中乙榜司教建平捐俸祠名宦鄉賢及修王叔英墓提學御史張璿巡按張仲賢皆以異才稱薦之丙午校文江西多得名士丁丑上春官崔文敏公銑置諸前列殿試賜進士第內閣覈閱所對策忠懇過人乃選爲庶吉士讀書翰林文名日起與進賢舒芬關中許宗魯臨清閻闔輩以志行相砥礪館閣皆推重焉已卯授監察御史巡城恤火甲靖獄市駕北征戒嚴巡檄回鑾以守城功被褒賞庚辰奉命往福建刷

卷兼查盤有司倉庫軍衛器械劾奏鎮守太監尙春  
追還官銀十萬餘兩糧二十六萬石前此使命所未  
有也封事累十上其論絕貢獻復史官通言路尤切  
治道流賊起山東破城邑兩廣盜亦時發時冗食日  
多帑藏日匱乃請稽歲入之數權其輕重爲定式且  
令戶部覆考績者視糧完否黜陟之朝議韙其言著  
爲令時元舅玉田蔣翰求以其子主 獻皇帝祀選  
除奉祠世襲且多所干索治中王槐阿附成之劾奏  
神不享非類以外戚主陵祀非禮決不可行且又求  
乞無厭他日驕恣如薄昭王鳳則蔓不可啗 上優

詔答之尚書林公俊會議曰御史言是會三邊有警  
論列太監晏宏都御史王翊當罷去而以致仕尚書  
楊一清代之從其言果靖虜患甲申巡按江西首械  
豪民互訟聚衆劫奪者獄訟爲之肅清逆濠旣伏誅  
其宗室多株連乃疏治其從獄數人餘悉末減始濠  
未作逆求新建伯王守仁巡撫江西有得其書跡者  
同寮多欲論列貫止之曰此間諜耳衆疑乃釋至是  
釐正平濠功次益慝人心自餘鋤強理枉輿人誦之  
甫五月而封君訃至凡命使罹憂例復命領公移乃  
得守制貫徑奔喪還家或懇止之哭曰吾方寸已亂

其如後罪何尋有詔許人代領人以爲孝感服闋行至贛州病作上疏乞歸詔報可家食七年庚寅督還朝時汪鉉掌院恃權見其蒞事判案不覺嘆服事多咨訪然心實忌之會大學士張孚敬方釐正祀典請去先師王爵及減籩豆佾舞之數貫大以爲不可率同列抗疏極言之鉉使人止曰疏上必得重禍且三日卽當差往廣西矣不聽上果震怒命法司廷鞫鉉迎合孚敬欲置諸死刑部尙書許讚獨不可會上怒稍解乃罷爲民貫還朝僅六十日耳給事中孫應奎管懷理皆論抹上譙讓不行去國之日士民爭

求識其面云家居杜門却掃奉太夫人菽水歡如也

### 祁敕

祁敕字惟允號堂野東筦人五齡通論語諸書十有二爲詩文有奇語十有五而春秋業成踰冠領魁薦于鄉卽藏修不出慕濂溪延平爲之贊師其心學充養日粹後進多從之遊久之逆瑾誅乃北上正德丁丑進士歸省庚辰赴銓拜刑部主事會季兄政上春官沒于途卽移疾護其喪歸督學魏公校至邑臨訪與語稱重之因謂師生宜以爲式甲申詣京復除刑部主事七月伏闕諍禮得罪獲釋詳讞明允廷尉稱

平三載以績最聞丁亥晉本部員外郎迭署諸司印  
受知尚書胡公寧委以章奏六月晉本部郎中平反  
公恕都民謂之祁佛爺嘗辨曹恕王良弼獄知爲岳  
民張雄所誣立出之公餘益績學名其齋曰日新作  
箴以自警戊子鄉試受命往廣西考校比入穀皆名  
士而錄文亦甚馴雅事竣取道歸省有司致費一無  
所受晤總制陽明王公于廣與論窮神知化大旨王  
公稱服語人曰祁正郎深於養者也抵家無何卽拜  
饒州之命單車往視事少保桂公萼素重之適桂家  
居然未嘗敢私謁時方習鷹鷂聲爲能而敕雍容裁

斷獄獄輒得其情出無辜者百餘人民驩呼以爲神明自是舞文吏無所售其奸而訟日簡會水旱薦饑躬檢踏以聞得蠲常賦民賴全活甚衆乃嚴儲水法修預備倉革排門夫役令下民皆稱便復增築鄱陽白馬隄浮梁胡白渠皆不擾而事集嘗議鑿井濟囚喝忽泉湧東廡下士民謂德惠所感名之曰應德泉而歌詠之暇則臨學與諸生談道置簿以楊善紀過恒獎其勤而矜其乏凡廟器射圃修飾完備弦歌俎豆藹然改觀每月旦令父老集于社學訓戒子弟置沒官田以爲館穀費按治下其法于諸郡縣俾踵行

之旌義獎節增祀鄉賢于學官又別立祀于鄉社皆  
前此所未及舉者其表正風俗類此淮府官校豪橫  
稍加戒諭卽詣謝求自新首相姻家有爲訓導者謀  
補教諭沮以大義當道報可輿論快之往吏員新叅  
鹽商稅船及存畱耗糧歲不下數千金皆屬守所私  
入至敕盡釐革之部使者考核治行爲列郡稱首疏  
于朝饒人歌之曰有影黃堂月無痕碧水秋至有私  
祠于家者時有命燒造郊壇磁磚限毋過七十日或  
獻計謂以土爲胚飭之以磁庶可易成敕恐欺君  
督工匠如法爲之猝不能就及逮赴詔獄怡然就道



凡餽者悉卻之士民遮泣不忍別形諸歌頌其卷口  
一磁不持云及抵京師法司以其賢能議罪從輕  
上覽奏遂謫貴州婺川縣典史敕殊不以夷險介意  
南還渡楊子江盜至舟人惶駭端坐自如盜驚歎而  
去壬辰九月行次袁州感疾歸就醫疾亟猶冠幘力  
止家人禱禳臨終惟以母太夫人爲念而已距其生  
年五十有三

王鳳靈

王鳳靈字應時順德之耕原人 毅皇帝十一年鳳  
靈偕兄鳳儀舉于鄉俱從吳姓明年丁丑鳳靈舉進

士授刑部主事始疏復王姓云鳳靈生有異質日誦書數萬言輒終身弗忘爲文章以氣勝其起家比部郎年甫弱冠乃明習法律如老吏宦官張銳都督錢安等罪當死詔減戍且許贖金諸法吏咸愕然鳳靈獨疏論之其略曰此等非逆瑾爪牙則錢寧羽翼非交通宸濠則結好江彬蓋必誅之賊也今以賄囑轉移聖慮臣恐奸雄同覺皆將謂私交可無誅亂政可不殺而獄可賄鬻肆無忌憚天下之毒可勝言哉疏奏竟如法司議給事中陳洸者罪有顯狀世廟以議禮故庇之鳳靈疏言曰議禮者自議禮犯罪者自

犯罪何得援此以掩彼也臣聞先朝開國靖難及諸  
迎立元勳豈無寵利動觸刑章卽如議禮諸臣深係  
聖心而或處極盈之會犯不韙之科陛下亦將與  
衆棄之而不得私如洸之罪又奚待而持不決之疑  
乎諸曹咸爲之悚然自是無敢復庇洸者矣其練達  
守法類如此年未三十出爲襄陽太守未幾以母喪  
歸服闋補淮安淮稱劇郡鳳靈至問民所疾苦清徭  
賦擊豪猾數十輩更創郡縣又闢龍溪書院廣徵屬  
邑士與肄校其文藝爲之筆削刻曰同文錄又引淮  
水入泮以開科第之祥故其門人一時登科第顯庸

者甚多淮故患水鳳靈首疏五事以疏泄重農爲先  
又因頻歲旱蝗連上秋災夏蝗等四疏請蠲秋糧雜  
賦出餘鹽銀數千以賑民復疏停馬價懇惻數千言  
俱得請民賴以甦嘗鑿淤河辨疑獄緝治巨盜卽古  
稱廉明何加焉在淮五年擢陝西學憲淮人卽龍溪  
書院爲生祠祀之未抵陝遭謗歸起補霸州兵備佐  
翟相行九邊又督城沙河議省費忤柄事者故疏畱  
五載始遷廣右大叅未赴忌者以考察竟罷之鳳靈  
性伉直好激論天下事以此多忤人功用惜未究也  
其文章名高于時所著有淮陽稿及諸奏疏字法王

右軍人珍慕之今淮諸生稱曰筆峯先生列循吏傳  
鳳儀亳州學正子一貫舉鄉試亞魁海豐知縣

何鰲

何鰲字子魚號鴈峯順德縣人正德戊戌進士爲慶  
元令均平里賦驚擊豪梗以治行入爲御史巡湖廣  
卹災摘伏多赫赫可頌出守松江革科斂清冊稅除  
機戶正糧役小民蒙其利而巨室或嘆之遇旱暴烈  
日中且拜且禱雨應期至郡有靈芝醴泉之異皆辭  
而弗有晉浙江按察副使定驛傳條約歲省費以巨  
萬計去縣令奉職之尤無狀者盜息民安訟獄以清

晉叅閩省尋晉右轄遷湖省左轄咸有治聲未幾卒  
十九江得年僅五十鰲孝友明達學術足以大用臨  
事有遠識在武宗朝佛郎機夷人假貢獻以窺南  
海逆彬甘賄使侍上肄夷語於是夷酋憑恃寵靈  
部見踞鰲鰲時爲御史疏其利害請銷患未萌逐之  
出境朝議從之及按湖廣詰發襄府僞官復楚世子  
侵地往藩封祿米不時給則謹于有司鰲奏撤去稅  
使以守臣抽分充其缺乏以給藩祿而人無弗稱便  
者備兵徐州河溢爲患藉兵夫餘力築長堤自沛亘  
徐連絡百里隄成而大水民免墊溺皆治行之可紀

者也

張 潔

張潔字景川順德縣人弱冠登正德戊戌進士知建平縣素號難治至則進長老問民疾苦而因革之重學校勵忠節飭范仲淹之祠表王叔英之墓已遷禮部主事會大司馬王瓊與都御史彭澤有隙澤經略哈密以金幣與土魯番贖城印未幾土魯番復據哈密犯肅州瓊遂劾澤擅命遣使納幣啓釁欲殺之並逮都御史李昆副使陳九疇澤剛毅敢果屢討流賊有功時議多右澤者一日瓊遣其屬持牒會潔窮核

其事曰此趙宋覆轍事成有顯擢與景川共此老禿翁何如濬正色曰王公誤矣大夫出使于外苟有利于國家專之可也澤與土魯番檄固在豈宋屈已和我比耶爲謝王公毋汙我使得罪天下後世卒不署牒事以得解遷員外郎嘉靖甲申以議大禮從諸大臣赴左順門哭諫不起上震怒收繫詔獄已而廷杖之濬被杖死年僅三十有八濬未死前猶力創草疏數千萬言及彌留投其疏謂李義壯曰身盡廢獨此心耿耿耳言已而逝聞者莫不傷之

陳 騏



陳騏字夢祥南海人少喜技藝工畫能醫有司使視  
重囚入獄中穢不能忍恥之乃學舉子業爲邑庠生  
時年二十七矣三十一舉于鄉連登進士拜大理寺  
評事晉左寺副修撰羅倫以剛直許之陞江西僉事  
發奸擿伏有能名分巡嶺北民病瘴以藥活之者至  
八百餘人勘虛糧明經界均徭役民不敢欺有病死  
而婦以被踢殺告者騏視而折之曰傷必有血蔭今  
肋骨形彎內黑外彼能自內踢耶煮皂角水洗之黑  
色盡去獄遂決人服其明巡九江以南火燬學宮文  
昌祠凡清出虛糧十八萬三千餘石儲贖罪穀備賑

濟至二十一萬六千石有奇以各道罰罪銀市材倩工修理學校祭品及正聖賢像服之不如制者七十人所毀淫祠九十七區陞雲南副使時鎮守太監錢能家人不法每爲騏所抑能中傷之訐奏落職家居年八十餘卒

### 劉士奇

劉士奇字邦正廣東龍門人正德間舉進士主事刑部錦衣千戶陶淳枉法殺人言官請逮治士奇竟法之轉員外郎議禮與諸臣伏闕哭諫杖不死遷郎中山陝兩藩與有司訟奉命臨訊論如法出守梧州梧州

州關有權征以給軍餼時有奇羨士奇毫不爲染民多竹舍不戒于火延燒輒數十百家士奇患之表火道度數家障以崇墉災乃止在郡七年超拜廣西左叅政江西按察使有某甲者一家九人文致于盜幽囚數年士奇鞫而釋之右布政山東以病乞骸骨歸士奇廉家無餘貲或傳士奇常欲市蜺問其妻妻曰何不書清字與之杜門八年卒

### 何 宏

何宏字道充廣東順德人正德二年舉于鄉授通州學正待人和易然尙氣節不可撓屈文廟分獻據禮

與州守夏邦謨爭論請於督學督學竟直宏也諸生  
令居舍中月課之又爲籍書勤惰微疵督學至則以  
名聞講行四禮弔死振乏人人感勸以父憂歸服除  
補泰州學教如通州歲饑巡撫發廩遣弟子監之曰  
何先生弟子必不欺也其見信於人如此遷六合知  
縣縣當孔道民棘於供億宏均其役稱畫一焉關浮  
屠禁奇袤淫靡之習斷獄明允不畏彊禦卽上官未  
嘗少徇有貴戚與豪民訟久弗決刑部以宏往遂決  
之溧陽民坐殺人拷死相繼不白御史下宏遂白嘗  
具獄上御史田頊三反宏三執人謂必獲罪矣頊竟

薦之曰縣令不爲御史所撓可不謂賢哉人亦以是  
賢頊也擢南京江西道御史六合人爲立生祠吏部  
非人宏上封事逮詔獄尋赦之遷德安知府未幾以  
妻子連喪致仕

鍾 曉

鍾曉字景暘順德之龍江人少沉毅寡言笑鄒智之  
謫石城也曉師焉以舉人分教梧州督學重其學行  
檄主桂林書院九載遷國子監學正南京貴州道監  
察御史奏革錦衣金吾龍驤騰驤四衛冗員及工部  
冗匠歲省漕粟數十萬劾叅政王奎叅議王泰白金

敘事李淳皆宸濠黨也刷卷四川諫迎生佛請召還  
使臣毋空糜十餘萬又奏停采木蜀人德之熊給事  
簡御史時亦以使事在蜀則共請建儲疏至而武  
宗晏駕矣未幾爲忌者所排謫判沔陽沔陽志稱其  
長者政事志節足稱云遷知歸州先是湖廣中路與  
四川石柱兩土官爭地相攻四十餘年兩省官不能  
決曉奉檄訊之片言而服人以是稱其敏同知瑞州  
進思恩知府致仕曉居官三十餘年貧約甚於寒生  
嘗治室梁矣比鄰惡其蔽已卽裁其楹其鄰反自愧  
謝八十五卒後二十九年知縣沈某曰曉按蜀著謬

諤之節居家有恂恂之風男子六人無百金之產以清修白兩臺表之子千亦同知瑞州

方重杰附子夢升

方重杰字思興世居南海尚書謚簡肅冢子也少奇俊老成侍父仕粵值黎人符南蛇構亂父在軍中歷三年所母陳氏病劇徧叩諸醫弗効重杰心皇皇一夕焚香籲天曰母以父憂子恃母育願母生卽眇躬奚卹哉乃持匕首割左臂肉和粥以進母啖之疾尋愈嗣有訛傳父遭兵刃者母輒驚怖卒重杰殞殮弗愆於禮哀毀隕復蘇年方十五也粵諸父老靡弗咄

咄嗟異扶襯還遇夜雖風雨露次弗離遇荒林野藪  
聲烏烏孺慕使人不忍聞當其時父與叔左方伯良  
節一時並仕膺顯重杰獨閒處對古聖賢戶外事若  
不聞足不踐公庭父清白吏俸入不足庇其家重杰  
能同苦節韋布糲食奚啻蓬累父歿廬於墓側時有  
朱蛇盤旋廬舍中弗去者旬日臺司行檄獎扁其門  
重杰嘗受業於東所張詡操養漸充正德己卯舉於  
鄉再上春官不第遂脫跡名場卓然心性之學甘淡  
薄絕嗜好以顏子淵程明道爲矩矱妙契疾書根極  
要領著希明錄以見志後病嘔血卒屬續之日令其



子講疏食水飲章歌歸去來辭自作挽文至死不亂  
大理卿黃鞏嘗曰簡肅之有重杰猶張忠獻之有南  
軒也學憲江以遠檄送孝子祠與唐林攢明陳茂烈  
諸公並祀 世宗朝巡按御史曾佩疏言其孝行詔  
立坊旌表重杰子夢升字君符郡庠生因父羸疾亦  
嘗舐糞割臂肉願以身代孝義彰聞屢經褒獎督學  
田汝成特寘於優等廩食之將貢卒人稱世孝云

### 林挺春

林挺春字少和順德縣人一字元育從湛元明先生  
遊事親至孝藩臬旌其門挺春日事親若曾子可也

舉而律我當伏不孝之刑奈何以爲嚆矢隨屏去之  
以舉人教諭仙遊仙遊故有田租掌教多侵漁挺春  
悉散諸生嘗自作籩豆禮器或謂有主者曰學佛乃  
舍其身吾何惜錙銖而儉夫子遷知零陵調南靖南  
靖兵燹後官寺里屋一空蒿藿成林白骨滿野虎豹  
晝行挺春芟穢掩骼驅虎豹而遠之倚茅聽政已洪  
水至城郭蕩析乘桴露處乃遷于大帽山下邑焉漳  
經界不正自朱子已患其然今尤甚富者割倍賦之  
田無直以啗貧民貧民利而從之旣賦日積縣官受  
其病挺春悉以均之招流移撫凋瘵南靖大治遷居

益州知州以親老不赴挺春醇謹自筮仕至老未嘗一介取於人罷官益貧人以是重之

梁廷振

附李翔

梁廷振字伯綱甫十齡事親盡禮時稱孝童正德丁卯舉于鄉登嘉靖癸未進士連丁內外艱號痛屢絕年四十二鬢已雙華服闋授兵部職方司主事尋進郎中廣西土官互相讐殺總制陶奏請大征會安南弗庭朝議主討廷振皆力止之中外賴安戊戌出爲廣西副使與叅政翁萬達監督諸軍進勦斷藤峽號令嚴肅民不知兵捷聞賜金幣復平府江諸徭平樂

之民得以安枕遷福建右叅政督理糧儲公餘講學  
閩士嚮風晉按察使憲度貞肅比入覲不持一物清  
風穆如會遷浙江右布政使尋轉左遇旱禱雨輒應  
時大工木商應給銀十八萬兩經久未支廷振奏給  
之衆商欲以萬金致謝斥絕不染其廉介類此未幾  
卒于任百姓嗟悼初廷振爲孝廉下第能遠扶洗尚  
文之喪以歸又能敦篤友愛感悟其弟旣分爨而復  
合食後自郎署陟方岳置園二畝田一區悉與弟共  
如廷振者世可多見哉先是有李祥者成化戊戌進  
士亦歷官貴州左布政雅有清操一介不苟取爲白

沙先生高第與廷振前後竝稱二方伯云

何維栢

何維栢字喬仲少遊三水庠見同舍生臨祭而謔輒引避以爲辱已衆皆愧服嘗慕西樵泉石之勝負笈讀其中時湛文簡霍文敏亦山棲與語多所默契嘉靖辛卯舉于鄉乙未成進士選庶吉士尋授御史疏止沙河功德二役省費百萬再疏罷征安南極論毛尚書伯溫奪情非禮上多嘉納未幾謝病歸西樵常與劉模王漸達陳激衷往來論學復補御史出按八閩值歲大祲多所賑恤存活以數十萬計因條救

荒十策著爲令是時少師嚴嵩顙柄維栢首發嵩罪  
比之李林甫盧杞上震怒遣官逮繫所過士庶遮  
道攀畱緹騎持之益急諸生大哭維栢謝曰此予慮  
定而後發人臣之義自當如是何哭爲逮至幾死杖  
下竟削籍歸屏居僧舍聚徒論學隆慶改元復原官  
超爲大理寺少卿俄遷左副都御史協理臺務徐少  
師階楊少傅博甚重之大政多所取決尋以憂去萬  
曆初徵拜前職無何轉吏部侍郎前後請脩聖德勤  
聖學飾羣工語多切中會少師張居正遭喪奪情衆  
議保璽尙書張瀚私叩之對曰天經地義何可廢也

語泄見忌出爲南禮部尚書次潞河遂乞骸骨歸角  
巾野服恣遊名山關天山書院聚講發明陳白沙宗  
旨薦紳之士卽皓首猶北面就弟子列如尙書葉夢  
熊僉憲陳吾德尤以勲節著聲海內云卒謚端恪所  
著有易學義禮經辨太極圖解天山存稿及編陳子  
言行錄傳于世弟維椅亦登進士選庶吉士遷禮部  
主事子崇亨以廕歷南京都督府經歷

### 侯國治

侯國治字平裕南海人嘉靖甲午領鄉薦庚戌授應  
天之江浦令邑當南北衝衢輪蹄如織貢賦繁疲國

綜理有方民用不困擢爲寧波府同知時寧郡中  
倭方甚國治職專海防躬巡禦於舟山昌國之間屢  
濱危險不避平倭捷奏得與賜金委署鄞縣慈谿定  
海餘姚所至俱有殊績而城慈一事功烈尤著慈人  
尸祝之居五年稍遷南都督叅軍轉戶部郎中請告  
隆慶庚午起督密雲糧儲密爲畿輔重鎮主客兵餉  
以百萬計當事者因而自贏國治嚴覈其餘盡歸之  
公歲省可三之一邊庭皎然未幾出守思恩所轄土  
司夷落國治蒞以清正峻卻餽例搗北三之巢定武  
緣之屬思恩自是赫然改觀尋陟廣西按察副使備



兵蒼梧時大征八寨督府以國治監夷江軍國治先在思恩計賊情形甚熟遂以蠟書約會諸將一鼓殲之比奏功夷江爲第一晉國治左叅政國治遂引年乞骸骨時萬曆庚辰之九月也國治爲人廉明謹畏治家尤嚴出入進退尺寸不爽歷官三紀無一字掛彈章歸日闢一堂于青門外引海潮入灌畦種蔬雜蒔花卉以自誤無事絕跡不至公府精神素饒年過九十猶能夙興揖拜祭祀賓客無惰容見者驚異鄉里後進奉爲儀刑者二十年乃卒世以人瑞歸之

龐尙鵬

龐尚鵬字少南南海人嘉靖癸丑進士筮仕樂平縣  
治行卓絕召爲監察御史命覈浙直軍餉發總制胡  
宗憲監軍鄆懋卿冒破之奸語侵權相嚴嵩幾中奇  
禍復命猶執奏如前直聲動天下上防倭五事計畫  
詳悉出按河南丰裁尤著強宗斂戢貪墨吏望風解  
綬去巡撫蔡汝南獲白鹿于王屋山欲會疏獻尚鵬  
固執不可尋丁外艱服闋擢赴河南道理考察事時  
科臣胡應嘉刺太宰得罪尚鵬疏救甚力且劾輔臣  
郭朴中外凜然再按浙江首發歸安豪宦縱橫之罪  
全浙不寒而慄又立均徭條鞭法歲省費百萬請著

爲令通行恩遍海內隨在立祠祀之礦徒昌亂亟促  
撫臣劉畿勅平紀功時釋幼小千餘懽聲載道旋建  
孫忠烈祠修岳武穆墓以勵風化改提督京畿學校  
都人士翕然丕變會 莊皇帝踐祚條陳時政數萬  
言擢大理寺丞時議興復九邊屯鹽晉右僉都御史  
以行甫次昌平卽疏劾內侍張恩馳驛殺人司禮護  
恩得從末減又劾御史孫以仁賊私狼藉并劾給事  
中張齊陰壞邊餉言官憾傷其類思有以中之矣尚  
鵬巡歷各邊足跡殆徧河套搗巢與總督王崇古克  
成厥功爲執政所忌不得敘上會計錄言從古征斂

多則民窮盜起天下遂大亂臣親視邊方生靈愁  
苦語甚激烈又疏請卹錄大獄得罪諸臣下部未報  
至甘州御史郅永春修前郅中之疏下吏部楊太宰  
博持之甚力忤輔臣高拱意傳旨勒博致仕而落尚  
鵬職九卿科道會疏畱之不報未幾博召用尚鵬亦  
以僉都御史起督福建軍務蠲宿逋五十餘萬踰年  
擢左副都御史協理院事時權相張居正聞喪奪情  
罪及言者尚鵬移書申救居正黨陳三謨承望風旨  
以考滿年月小誤指摘遂奉旨回籍聽用值母病劇  
得承訣時謂天成其孝云居四年卒尚鵬忠介慷慨

經濟素優其膽略足當大事定大變立朝知有法紀  
不顧一身利害當官知恤民艱不避一時讒疑海內  
縉紳倚以爲重者幾三十年所著有百可亭稿十六  
卷奏議十卷藏于家別有殷鑒錄行邊漫紀仲弟尚  
鴻彙次爲評斷疏進之粵人以條鞭故立永賴祠歲  
時報祀比於崔清獻云

龐 嵩

龐嵩字振卿居南海弼唐鄉學者稱爲弼唐先生嘉  
靖甲辰由鄉舉授應天府通判晉治中先後凡八年  
大京兆缺屢攝府事初至早魃爲災嵩督賑委悉霑

沿公粟旣竭貸之鄉先生富民誠意懇惻人多應者  
所全活無算已而蠲其積逋於以勞來拊循之所繇  
以復業者十萬六千有奇部民苦役重嵩取公費議  
寬之令甲首輸鎚免其置辦付之印簿以防侵漁清  
寄居客戶以助夫役移僻驛馬正以甦衝塗覈冒濫  
優免及詭稱官戶寄庄戶女戶神帛堂匠戶以實丁  
口八邑皆蒙惠焉時江寧葛僊永豐二鄉數有水患  
居民餘七戶而已歲課不能辦嵩爲築堤闢萊得田  
三千六百畝立惠民庄四召貧民佃之流移盡還而  
全邑訖無代輸之苦百姓至今賴之折獄無細大必

得其情有張元二者以追逃婦不反嵩躬至婦所見  
室畔縣崖矗立林木颯然心動行數十武而前佯執  
村老訶問之對曰我但見屍遂得元二殺人狀又高  
淳傭人亡其妻妻家以爲死執之嵩偵知鄰有畫工  
以其妻歸日遯也計致畫工奪還之聞者以爲神戚  
畹王湧舉人趙君寵占良人妻殺其夫嵩并論死居  
間者萬方拒不聽嵩饒吏幹在事拮据百廢具舉尤  
加意造士暇則進諸生課之自捐俸以資賞給歷寒  
暑無倦淹通五經爲諸生發疑抉異無不虛往實歸  
者早遊王陽明湛甘泉兩先生之門至是奉其緒論

爲諸生規建會於新泉書院日與講習以故一時文  
行之士成就興起者爲多性嚴明嶄嶄不可犯而又  
與聞於名儒巨公以是施之政亦以是持其身見義  
勇爲獨信一力雖賁育不能奪也單騎行縣所至肅  
然一蔬片楮不以煩民人目爲龐青天云晉南刑部  
郎中曲靖軍民府知府所在士民銜德旣去而追思  
之葛僊鄉有特祠至今俎豆不絕云

梁有譽

梁有譽字公實廣東順德人也公實爲諸生卽名能  
歌詩傾嶺南矣已成進士燕中卽又傾燕中人而居



恒不自得鬱鬱思歸補尚書刑部郎間與不同舍郎  
李攀龍王世貞游乃稍自愉快曰世故有人哉而郎  
宗臣已去爲吏部休澣輒一來俄而郎徐中行來中  
行故常與公實遊南太學深相結者也以是日相與  
切劘古文辭甚懽而一旦念其太夫人竟移病滿三  
月上書請告歸公實聲愈籍甚當徙郎吏部吏部亦  
推擇嶺南郎一人有以此風公實者公實笑曰吾自  
欲歸豈以刑部郎少之故而一吏部能縻我哉竟去  
弗顧至濟上而貽百韻詩攀龍輩爲別百韻卽古自  
杜甫氏而外不恒見也而文甚工郎歸乃杜門度圖

史丹青彝鼎之類一小閣卉木竹石環之而身吟誦  
其間囂然不屑也郡國大吏雅慕公實于旄門相踵  
公實則以一蒼頭謝卻不任客鄉里褫袴子跡絕不  
相聞而潦倒書生挾策剝瑑則尋聲出延食之矣然  
公實所最善者攀龍輩武昌吳國倫最後定交而謝  
榛以布衣故公實亦間從遊其於鄉師事故黃文裕  
公佐而友黎戶部民表當與民表約游羅浮山觀滄  
海日出沒探勾漏令丹鼎庶幾其一遇而屬海颶作  
不可以舟乃止宿田舍者三夕颶益甚山木盡拔道  
爲徙而公實亦意盡乃賦詩而歸是時屬疾寒中湊

矣歸而疾大作遂不起年僅三十有六也公實以念  
太夫人故棄其官萬里歸養而竟先太夫人以死歸  
益謝棄交游期以歲月窮古作者之蘊而卷若未觸  
手庭卉木弗及新以死嗚呼何以死也公實所爲集  
若干卷具在取其上駟而擬古作者無大愧其下駟  
亦足以走夫後死者卽公實不死也

陳紹儒

陳紹儒字師孔南海人生而異光滿室五歲讀小學  
孝經明愛親敬長之理弱冠補從化諸生應嘉靖辛  
卯歲貢卒業成均時司成湛若水呂柟咸器重之丁

酉領本省鄉試戊戌登進士給假歸省適母病晝夜  
扶持不少懈旋授戶部主事晉員外郎詰內豎混竊  
之奸革倉庫積年之弊議設陪庫主事經歷大使各  
一人以防闌出著爲令歲羨至盈五萬遂晉郎中命  
總理遼東糧儲兼理屯糧三年章凡十數上皆防守  
大計時承平日久忽報虜寇至紹儒登陴拒守寇不  
得逞自是益習騎射射必破的諸將驚謂神授調山  
西雲南二司進會計錄省京邊冗費二十餘萬陞湖  
廣副使分部荆南襄樊水溢城不沒者三版乃議築  
老龍諸堤以捍之水不爲災又設法賑饑存活萬餘

人襄人樹碑峴山以紀其事居二年爲權貴人齟齬  
文致其罪謫泉州同知未赴轉南昌知府越五月陞  
廣西副使督狼兵救援兩浙紀律嚴明所過秋毫無  
犯晉福建叅政丁內艱服闋補四川叅政尋轉按察  
使平白蓮教秦政和之亂馘其渠魁散其黨三千餘  
衆擢廣西右布政轉左丁外艱起補雲南卽召爲順  
天府尹時 穆皇登極百度惟貞紹儒釐革縣驛冒  
濫豪貴斂手甫六月轉太常寺卿 上耕藉召問禮  
儀按經以對 上建之晉南京刑部右侍郎未幾召  
還戶部條陳遼東甘肅等鎮兵馬主客錢糧之數凡

萬餘言經濟鑿鑿皆可行者 上嘉納之轉左侍郎  
提督京通倉場議復漕運例限至今遵守其制陞南  
京工部尚書爲忌者所媒孽致仕歸土垣竹扉甘澹  
自適室無二八之奉坐無九九之客惟手一編弗間  
寒暑誨子弟必以忠孝大節爲先至老不懈年七十  
六卒詔給祭葬子弘采以廕至知府弘乘博學砥行  
以孝友聞不喜爲貴介容交於當路繇歲薦歷善化  
知縣葺頽圯杜侵欺剖冤滯未期月而百廢備舉竟  
卒于官子熙韶選貢生熙昌領丙午解額熙陽亦登  
同榜世多榮之

蕭端蒙

蕭端蒙字曰啓南海人父與成舉鄉試第一尋登進士官修撰蒙少治老蘇之學與季父潔俱季父多技  
能任俠而蒙沈靜有器量好讀書舉嘉靖辛丑進士  
選庶吉士改御史巡按貴州先是貴州無制府兩省  
諸司以客相視謀篡異同動相牽制一方有事彼此  
提衡而立蒙請置重臣撫綏其地而事權始一又貴  
州試士皆會于滇南至是始得專試蒙請廣其額以  
風遠人上皆從之明年還朝道病因自免家居後復  
起爲浙江道御史按江西時藩王驕縱自撫制大吏

仍辱其長吏蒙劾王不道捕麾下治之境內肅然丁  
內艱歸未幾疾卒

黎民表

黎民表字惟敬號瑤石廣東從化人由鄉貢進士任  
中書舍人擢南京兵部車駕司員外郎性嗜詩篇屢  
有刻本且善臨池之技其隸書得其師文衡山先生  
家法大爲宇內人士所重

趙勳

趙勳字彛伯番禺人少秀整長好學博通經史弱冠  
補郡學諸生嘉靖戊子舉于鄉辛丑銓授江西瑞金



令瑞金爲贛小邑隣于閩使傳旁午供給繁苦泰和  
安福勢豪多以寄庄優免土著民久患差役貧不堪  
命勦申請均繇始得蘇息節省浮費興起學校瑞金  
素乏利名進弟子員戴汝器而授之經踰年輒舉于  
鄉龍南信豐饑芋載道委之賑濟存活甚衆兼攝他  
邑一如瑞金循良之聲播于遐邇按撫交章薦之先  
是安遠有黃鄉賊洞路通閩廣萬山巖險征勦莫及  
賊葉氏世統其衆也曩設軍門奏給千夫長印使就  
羈束乙巳冬千夫長妻曾氏代夫主洞二子冲幼姪  
葉經糾衆剽掠提督都御史奏請征之官軍敗于賊

殺一千戶一縣丞勢張甚於是兵備副使薛公甲謂  
虞公曰事迫矣非趙瑞金莫辨此賊幕府召問方略  
勳曰賊方銳戰必敗也今聞賊亦自困且厭其首亂  
可往諭使自縛虞公壯而遣之遂挾四小隸單騎入  
洞初往賊猶未信列兵露刃夾道擁視勳推誠慰撫  
曾氏相率跪服手縛葉經及梗化肆掠者數十人以  
獻餘黨悉降勳又諭曾氏曰官軍征汝奏聞于朝今  
雖縛姪而二子不詣軍門何以示效順曾氏卽出二  
子付勳曰二豎子之命在公矣勳曰二子卽吾子也  
當是時諸邑聞瑞金縛賊且得曾氏二子歡呼道路

勲以二子入軍門觀者萬人無不稱快虞公不待報卽以便宜赦曾氏二子送郡學觀禮勲再入洞築城寨設巡司而黃鄉賊無不歡呼樂業者是役也不餉一軍不廢一矢百年逋誅一旦歸命以治行徵拜南京監察御史舊規內守備太監守備國公不理細務惟人命賊情許兵馬司引稟時漸不如制且役辦無名竊盜攀指最爲民患疏陳五事禁無名之差役革官司之借辦罷竊盜之工價嚴巡捕之考覈省引稟之煩勞世宗皇帝下其奏南京守備諸司爲之斂戢武職犯法憲臣窮治波及無辜幾至激變事聞覆

叅鞠之懲其首惡餘皆薄治 上俞從之壬子選  
山東按察僉事巡東兗濟南二道執法詳明存心忠  
厚審錄獄囚決配者卽遣之冤抑者免齊魯之間稱  
明決焉歲大饑人相食巡視拯卹不遺餘力豫徽州  
邑告賑卽發不待報可民賴以生者萬計採荒之策  
一如龍南信豐矣僉事三年前後論薦于朝者十數  
疏甲寅以憂歸遂家居不出勲爲循令尹爲名御史  
貞憲秉度爲按察尤有聲五十懸車論者惜其位不  
究德云有遺集五卷藏于家

羅虞臣

羅虞臣者順德之大良人也字熙載穎悟絕人觀書目數行下九歲能屬文弱冠舉進士補建昌推官建昌號繁劇難治虞臣至郡以文章潤飾吏事日召善書史數人於前口占其所謝故人書手授其所爲文且省吏事各有條退則讀書至夜分乃就寢故虞臣居官文日益進郡中亦翕然有文雅之風三載徵拜刑部主事改吏部與李開先任翰輩以文章氣節相高而虞臣尤剛腸疾惡面斥人短以故多忌之者開先曰熙載且見中於法矣會宛平人劉東山僞上變告張延齡姦連虞臣於是逮詣詔獄治虞臣乃從獄

中尙書通政鄭紳覽書棄去不奏獄成下御史府大  
夫王廷相當虞臣故縱重囚黨結元惡杖五十褫職  
爲民虞臣旣歸就中山結草堂墳索置前圖牒陳後  
總括百家馳騁千載雖仲舒覃思下帷嚴平不窺城  
市猶自謂過之也嘗言虛生不如營名義古不如自  
立其志如此兩廣都御史蔡經薦于朝未用卒年三  
十五所著有原子集

郭 棐

郭棐字篤周南海人弱冠由儒士領嘉靖己酉鄉薦  
師事湛若水與聞心性之旨壬戌成進士初授戶部

主事尋改禮部會 穆宗卽位次日傳封七夫人御  
禮出棐力諍納還曰方今 先帝廟號未尊中宮母  
儀未正而遽有此舉何以示天下事得寢輔臣高拱  
以專擅爲時指摘間語棐曰人言相度可操舟如太  
橫何棐應聲曰儻其橫不能操更願相公廓度矣拱  
滋不悅棐遂以祖母年耄請歸養因疏陳十事如設  
史局之官錄于謙之後進薛瑄陳獻章從祀孔廟皆  
納棐議獨以數忤當路出爲夔州知府夔地巖瘠棐  
務課農養士爲根本計作仰高夔龍二書院選諸郡  
邑之雋躬董教之又兩校蜀闡所得皆知名士晉湖

廣屯田副使攝蘄州道有柯賊數千爲梗督府陳瑞  
欲提兵殄勦裴戒勿輕動願以身往果得首惡正罪  
來往興國界中數經江陵之家不投一刺萬曆丁丑  
始改四川提學時當國者方嚴功令督行汰士法裴  
守正不阿掄選公明居前矛者學士范醇敬輩登鄉  
會榜幾三百人皆屈指豫定前此所未有也梁山署  
印某通判杖斃生員李夢祥撫臺力護之裴按法執  
治不少貸因而得罪去官癸未抵京將補銓司相國  
申時行余有丁皆裴同年雅欲推轂而裴每見輒進  
規諷由是失二相意僅除廣西右江副使至則首平



象州洛容等亂脩柳慶賓象四學旋陞湖北叅政糴穀萬石以賑繕武陵龍陽沅江等邑隄六千餘丈又計擒苗夷楊廣和等一方獲安秩滿轉山東憲使值倭奴窺邊裴計畫防守全齊晏然未幾陞雲南右布政捫行堂事滇人方苦師旅苦貢金裴爲平丁苴戢緬寇疏罷增金二千兩以救疲民爲閣部所抑不得奏乙未大計罹人言裴遂乞休詔晉光祿正卿致仕居十年卒裴忠孝天植處父母兄弟自少至老毫無間言孜孜公家夙夜匪懈其與人外柔內剛榮辱生死不爲動初擬昇甲後擬內擢皆爲權相所擠遭廻

三十餘年官止外藩家業無所增益至於建祠恤族  
或周急助義則傾貲爲之他如建塔濬濠防夷罷稅  
凡關桑梓利害力贊當塗舉行卒爲粵賴性尤絕聲  
色惟喜講學談文每手一編寒暑丙夜不輟戶外乞  
言者滿志而去竟無受謝屬續之日惓惓以國恩未  
報爲恨其子陽齡藉手親友始克成喪云著述傳世  
者有粵大記嶺海名勝記廣東四川通志夢菊全集  
齊楚滇蜀諸稿士林宗之

歐大任

崙山歐君生於廣東順德官江都訓導名大任字楨

伯有文譽與嘉靖間六子遊著作甚多已有定評  
伯青衣李英詩甚穩妥亦有小集惜逸其半

雲 奇

雲奇南海人洪武間內使守西華門時丞相胡惟庸  
謀逆其居第距門甚邇奇刺知其事冀因隙以發未  
幾惟庸言所居井湧醴泉邀 上往幸鑾輿出奇走  
衝蹕道勒馬銜言狀氣方勃崑舌駛不能達意 上  
怒其不敬左右亂撾捶下垂斃右臂將折猶奮指賊  
臣第弗爲痛縮 上乃悟登城頰顧則見彼第內壯  
士衷甲伏屏帷間數匝亟返櫓殿罪人一一就縛召

奇息已絕矣 上追悼加贈司禮監太監賜葬於鍾山之西命有司春秋致祭仍給六人備歲時灑掃

唐 豫

附子璧

唐豫字用之順德縣人父奎洪武初以經明行修薦授增城學教諭博覽羣書鄉人號唐書匭湛某寇至被執不屈死豫生而穎悟少從翰林典籍孫黃遊作詩文有古人風性剛介無諂曲痛父非命作蓼莪亭與周祖生周祖念劉子羽何淮劉子高友號平步大逸皆德行醇謹衣冠嚴偉爲人所欽嘗相與定鄉約鄉人信行之秋成後先輸公賦一補尺籍必遣少壯

當行之人二冠禮遵文公幣無過腆三昏先夕燕其子坐之南面曰漸老燕非禮也如禮醺之四父在子立違者叱之五喪無飲客遠者爲具蔬食朔望會哭勿畱六祭以四時忌日哭盡哀不飲酒食肉居宿於外如禮七禮尙施報冠昏喪葬其大者鄰里親戚朋友往來佐之八子弟教以孝弟睦於親族鄉黨讀書學文母令侈其衣冠博奕飲酒以爲父母戮九鄉爲甲幾其出入幾其所事其有奇衮聞于有司十豫子壁亦有文行母瞽不能自食壁晨夕飲食之母遇醫復明人謂孝感一時公卿皆重壁叅議陳贄待以賓

禮及改太常執手別曰卿吾三益也壁動循禮署未嘗去衣冠訓誘子弟端立正坐出入規矩然後授以句讀或見以爲迂闊曰文藝末事不收放心何以受教其敦行如此

黎貞

黎貞字彥聊新會人性坦蕩不羈樂以酒自放故號陶陶生晚更號秫坡學者稱之曰秫坡先生貞自少岐嶷異羣兒七八歲時與弟浴於塘弟溺塘井中雙指猶漾漾未沒貞亟沒水以手捉其足登淺處鄉閭異之五羊孫贊狂者才美絕人爲文章操筆立就死

生榮辱得失亦不以介意貞從之游故學所成就非一時流輩所及發而爲詩文滔滔自胷中寫出無斧鑿痕議論古今治亂興廢與世道得失人物賢否類出於已意而多得之洪武初補郡庠生部使者以其有學行署爲新會縣學訓導志不樂仕乃退築釣魚臺於所居宅前自擬嚴光後以事爲訟者所誣發戍遼東者十八年艱危困阨之中學愈博而識趣愈高氣愈充而議論愈出比脫伍歸聲益著學者從之遠近畢至貞諄諄善誘每俯而就之隨其淺深有所造就焉年五十九卒所著有秣坡集古今一覽家禮舉

要行于世初貞在遼時孫贊以事死貞抱持其尸以衣裹之殯殮如禮奉柩葬于安山之陽典衣營其事爲文祭之讀者莫不墮淚其篤於友義如此比其自遼歸也適已薄暮明月滿空呼舟中餘酒登所築釣魚臺吟嘯久之乃扣門還家焉其胸次脫落此類也

李孔脩

李孔脩字子長自號抱真子順德縣人僑居廣州之高第街混迹閭閻人不識也張詡識之則薦孔脩及雲谷老人于其師陳獻章獻章曰陳畱市隱不遇陳無已黃廷堅市傭耳雲谷老人李孔脩非廷實安知



吾郡二士雲谷老人得見孔脩少年如廷實非俛首  
當世人也往來之便庶接其論以信廷實知人善取  
士未幾孔脩適輸糧于縣縣令異其容止問姓名不  
答第拱手令叱之曰何物小民乃拱手耶再拱手令  
怒笞之五竟無言而出有庶母父沒改適誣孔脩奪  
其產縣令鞠之孔脩操筆置對曰母言是也縣令疑  
焉徐得其情乃大禮敬之由此人皆以爲駭蔽蠹薄  
產蔬食不繼未嘗羣其眉詩字不履前人自爲戶  
牖或觀山水歸而圖之乙者爭愛而酬之平居管寧  
帽朱子深衣入夜不違乙年不入城閩惟攻周易

城中兒童婦女皆稱曰子長先生間出廬戶則遠近  
圍視以爲奇物云吳廷舉由縣令歷藩臬在粵最久  
與孔脩爲布衣交兩人高風在塵埃之表粵人常道  
之孔脩卒無子憲使李中少叅王崇教經紀其喪尚  
書霍韜葬之西樵山西樵人祭社以孔脩配

陳鶴

陳鶴自號海樵山人世襲廣東南海衛百戶生而穎  
悟絕羣年十餘已知買奇帙名畫窮晝夜誦覽十七  
虞祖爵固不喜握鞬馘弓矢以自匿其芒角鬱鬱得  
奇疾百療莫驗則自學爲醫久之洞其旨自爲診藥

凡七年而病愈愈而棄其故所受官着山人服踰粵嶺下彭蠡游吳渡越徧交海內名士歌嘯諧謔一座盡傾對客論說其言一氣萬類儒行玄釋凌跨恢弘旣足以撼當世學士而其所作爲古詩文若騷賦詞曲草書圖畫能盡效諸名家間出已意工贍絕倫其所自娛戲雖瑣至吳歛越曲隸草釋梵巫史祝咒擢歌凌唱輓章薤詞儺逐伶倡萬舞偶劇投壺博戲酒政闔籌稗官小說與一切方言樂師矇瞍口誦而手奏者一遇興至身親爲之靡不窮態極調於是四方之人日造其庭盡一時豪賢貴介若諸家異流無不

向慕願得一談一飲以爲快幸性喜拔窮士士往四方又必借其片墨以動諸貴人每值集飲之處旅者行者舉爵持俎載筆素以進振髯握管須臾一擲累幅或數十丈各愜其所願而後止而往後箋札酬酢去畱目營心記口對手書又雜以論說娛戲如前所云者一時雜陳燦然畢舉無不氣折心醉願與內交而去如是者幾三十年以爲常一往金陵客四年而不復返矣初至金陵將造顧尙書璘先一夕夢李白至及見乃山人也遂深相結故客畱最久顧公嘗稱其氣雄邁跨諸貴游似東方朔才敏絕似劉穆之其

爲瑣細藝劇忽整衣幘談理道辨世務又大類曹陳  
思真海釀山負天賦以多能者矣

### 李義壯

李義壯字稚夫番禺人嘉靖癸未進士初令仁和其  
政在鋤治豪強矜卹筑獨二年遷戶部主事司臨清  
鈔關以進羨餘七萬受旌改禮部儀制義壯工古文  
詞其時諸郎如田汝成王慎中屠應峻悉負雋名而  
獨嚴事義壯以爲益友歷員外郎出爲廣西督學僉  
事轉湖廣副使備兵辰沅先是苗人不靖都御史萬  
義壯至督兵直走盧溪急攻其爲梗者以

次殲焉諸砦遂望風降附境內以平詔賜白金文綺  
加俸一級歷四川叅政福建按察使革冗弊清吏蠹  
杜請託縉紳大夫莫敢干以私者轉右布政擢僉都  
御史巡撫貴州時方征苗所規畫多與總制張公相  
左遂乞休旣歸有司造請多不報日檢閱百家之書  
爲文弘博浩瀚有則詩亦壯麗無卑瑣之態性剛方  
於人過必嫚罵不能容於砥礪名節者則願與交懽  
不少忤以故士論歸焉著述最富多散佚所存三洲  
初稿十五卷行于世子成性領鄉試第一蚤卒

何繼之

何繼之字克肖順德人登嘉靖丙戌進士知攸縣懲  
豪民張金逋負由是知名晉戶部主事歷松江知府  
却糧長常例累擢河南叅政互糴小灘以漕中都原  
額既足羨銀八萬七千餘兩同事欲私之不從遷福  
建按察使未赴隨遷河南右布政使抵家卒繼之謙  
和清慎積而能散見稱於時

岑 萬

岑萬字體一順德人嘉靖丙戌進士授戶部主事歷  
福建左布政使萬壽節御史曾佩拜于上萬引却之  
曰拜下之禮按臣何獨不然御史銜之論謫廣西叅

政遷按察使靖江王不得於母作慈母不慈記譙藩  
臬命伶人歌焉萬遽起曰此非臣等所忍聞也以子  
讐母於法不孝一旦上聞以此督過於王奈何王竦  
然立命焚其書母子遂歡好如初遷河南右布政前  
御史仍不解喉言萬老勒致仕年甫踰艾云年七十  
三卒

戴 銑

戴銑字子聲東莞人嘉靖己丑進士觀政吏部上時  
政疏千餘言授禮部主事督會同館峻抑廠校至怫  
中貴曹長諷令少徇持之益力尋改監察御史朞月



間言天下大計至十餘疏多人所難言者論劾尚書  
聶賢劉龍等六人不職吏部尚書汪鉉槩爲之護欲  
加銑罪上優容之後言官論鉉黨護奸邪中傷言  
官當路謂出銑謀坐免家居淡薄自甘足跡不至公  
門廷臣交章論薦未幾卒年四十六用不究才士論  
惜之有集藏于家子記亦登進士官楚雄知府

林烈

林烈字孔承東莞人父汝椿篤于行有長者風烈幼  
聰朗通左傳漢書嘉靖甲午舉于鄉嘗師事魏莊簡  
潛心理學所養日邃四上春官不第釋褐江陰教諭

淮南大理寺司務九載遷戶部員外轉郎中以勤慎  
著聲庚申督賦江右綜理惟嚴以外艱去服除復補  
戶部出爲福建鹽運同知革常例祛積蠹嚴關出商  
至如歸離政大舉於是毀淫祠興社學躬書院日與  
諸生講習其中又聯什伍恤孤貧置義阡立鄉厲壇  
脩養濟院民始患盜已復患虎悉力驅除之偶夢歸  
章綬心異焉適世宗遺詔至遂卒百姓巷哭商罷  
市立祠水口尸祀之烈學務躬脩一介不輕取與歷  
官二十年儒素如昨子培坦城俱鄉薦培最知名

梁 津

梁津字濟甫番禺人幼有至性事母區氏以孝聞三弟皆出庶母時在襁褓庶母素悍盡奪財產以私其子津略不以介意撫之益厚甲午發解第一辛丑進士筮仕刑部主事迎母就養以學行改吏部持清操杜私謁朝著賢之時大璫麥福最寵幸以同鄉求見津善辭之福亦服其素履不訝也循資當轉文選副卽同僚有越次鑽求者津卽讓之曰典選重負予寡陋且多病兄才望宜補衆皆服其量卒于官年三十有五母哭之斷腸而絕鬻其莫不盡傷太宰聞淵素重其賢尤痛惜之憫其貧率僚屬致賻遣官護二喪

歸

李鳳

李鳳字鳴岡番禺人其先大庾人父賢始屬籍番禺  
兄鸞登嘉靖辛丑進士歷戶部郎中嘗以經教授成  
就甚衆鳳少從兄學終身執弟子禮丙午舉于鄉後  
十年登進士知蕭山縣鋤豪強禁溺女均賦役士民  
咸孚頌聲載道徙治劇餘姚甫下車茂著倭功入爲  
大理評事治獄以不寃稱遷登州知府地瀕海饒於  
魚鹽歲羨數千金一切麾却之日理民事惟務節愛  
歷廣西布政使所至以清介自持不肯徇世權貴媒

學之竟以老罷歸官居二品其產業不足糊口訓家  
甚嚴兄子良柱亦登萬曆甲戌進士爲廣西叅議

### 唐守勳

唐守勳字允懋番禺人少有志向家貧力學嘉靖辛  
卯舉于鄉督府以學行延之嶺表書院爲諸生師甲  
辰登進士知閩縣舊例歲收綱銀支給公費不贍則  
預徵民甚苦之守勳裁浮冗節出入積有餘羨適值  
荒歉民獲樂生以憂去起補貴溪邑無城郭寇至率  
民兵禦之擒渠魁而還襁挾交薦遷南京戶部主事  
歷郎中己未擢興化知府卒守勳厚於倫理教四弟

如嚴師怠則撻之皆向學有立在南都時聞業師湯朝達之弟鬻其祖宅輒還券不索原直同年東莞令孫學古卒于客邸躬治其喪士論賢之有集藏于家弟守明守文並領鄉薦守敬以詞翰名家

李 价

李价字少藩番禺人穎悟有志學務躬脩嘗從香山黃佐遊登嘉靖丁未進士知當塗縣俸外一無所取地當衝塗前令逢迎無虛日价嘆曰吾安忍敝吾民以相媚乎專務節儉歲省民財數千已酉覈蝗災蠲民租十之四獄中大辟囚惟四人爲辨出其二有父

告子不孝者反覆開諭下其子朴之父泣請焉遂提  
携而出擢戶部主事里正馳至采石贈百金爲舟車  
費却之乃畱靴而去壬子以才行改吏部稽勲司主  
事遷考功員外郎兩列上考會三殿災欲上封事爲  
親知所沮亡何宿痞頓發乞休太宰李默止之晉稽  
勲郎中疾彌甚歸家踰年卒人咸惜之

### 李邦義

李邦義字宜之連州人生而穎異貌甚魁梧與兄邦  
仁齊名而邦義登嘉靖丙辰進士知上虞縣有異政  
歷戶科都給事中條陳時務指摘奸權人多其直歷

太常少卿尋改南謝病歸卒年五十七邦義有才而敏論天下事若走輕丸下峻坂恥爲媿姍態好面折人過以故爲世所忌居常感慨政令不便者輒白有司更之故人有遺思焉

### 岑用賓

岑川賓字允穆萬子嘉靖己未登進士授衢州推官補池州景王歸葬官校以供張不給多凌虐有司二千石而下不免守屬用賓能獨稱辦而民亦不擾擢南京戶科給事中喜論奏章凡數十上勸經筵崇正學擇師儒舉遺逸減織造尤其大者大學士高拱負



才剛狠狹中而忌隆慶初爲給事中魏時亮所劾而御史齊康希拱旨劾大學士徐階上皆不問用賓

乃奏言兩人日侍左右心孰邪正行孰臧否量孰廣狹豈能逃遁聖鑒高拱剛愎自用苛刻立威決非端人小則殃民大則誤國乞令致仕以杜厲階不聽拱深銜之以此出爲紹興守紹興人聞用賓來計必武健自用及至乃更爲寬和立教條木鐸以徇務在德化於是紹興人大喜有故人欲饋用賓畏其廉託以茗進用賓面發之得金大怒絕焉旣入計謫陝宜川坐猶以前憾故至踰月卒自嚴嵩當國沈楊輩以直

言賈禍人皆結舌及用賓在職言路復振終亦不免  
貶死海內惜之有小谷集行于世

### 梁 典

梁典字惇伯順德人家故貧少傳經以供其親比舉  
于鄉二親已沒輒欲棄之去已謁選授上林學諭其  
課諸生如傳經時上林遂彬彬多文學士矣遷南雍  
博士尋出判南康署篆于都昌建昌三縣而在建昌  
最久建昌學圯于河典浚河新之諸齋舍自此興建  
昌猶多逋負民卒流亡典緩之復業者相踵在南康  
三年清謹如一日伯兄嘗過其邸談及家人產典曰

視傳經時已侈矣卒于官百姓哀之子思年博古工詩翰喜談名理蚤卒今得其隸書者競珍之

劉格

劉格字豫誠從化人性至孝幼而父歿哀毀幾滅性弱冠舉庚子鄉薦壬戌謁選授六合令清慎勤敏百廢具舉徐國公家僮鎖禁良民格杖而戍之閭中丞擒江盜數百疏皆抵死密廉其枉者數十力爭之不少屈時稱強項令操江都御史欲脔削沿江官軍格不阿承遂調信豐會雩都令以丈田激變督府殷從三遣官弗能定格繼往片言解散執其首惡正法

馬從儉疏其能畱雩都而信豐士民請還益力未幾  
從儉去長沙李棠來代譖言先入徙荆府審理正後  
祀信豐名宦及鄉賢祠所著性說翼善論大倫圖多  
發古人所未發子克正克修並舉于鄉而克正登進  
士克治選貢

李

悅

附李翔嚴竦

李悅字子喜新會縣人天性孝友年七十言及父母  
輒流涕長兄七子二十餘孫產薄不能自存召與同  
居以已財產均之族人多來依者至百餘口庭無間  
言所居臨海颶風作棺骸漂集悅皆收而葬之同邑

李翔順德嚴竦俱以孝友稱翔進士授衢州推官以母老畱室事之携一僕以行尋擢主事欲改南迎養或止之翔曰近思老母夢魂顛倒遂請歸抵家七日而母卒人謂孝感竦置祀田捐產繼兄邑旌焉

謝佑

謝佑字天錫南海人嘗從陳獻章遊一聞主靜竅繁遂築室葵山之下棲焉竇甚并日而餐襪不掩脛晏如也塵世名利不少罍胸臆病中嘗寄友人湛若水詩曰生從何處來化從何處去化化與生生便是真元處未幾卒後若水祠其師于白雲山以佑配

何廷矩

何廷矩字時振番禺人爲郡諸生以文行爲督學胡榮所器重見陳獻章卽棄舉子業從之遊會將秋試廷矩毅然謝去榮遣人乘馬追之謝曰泉石疾已在膏肓矣遂不復出所著有禮意大全三卷存羊錄十卷皆本周禮云

霍任附弟傑

霍任字尹先南海人少同兄韜讀書僧舍衣冠相對卽暑夜不違人服其端莊兩試不遇遂潛心理學以主靜爲根宗絕玩好斷戲謔於聲色名利澹如也父

母沒哀毀成痞齋素三年廬墓西樵服闋因移家墓下兄方歷顯要秉銓衡而任托跡谿谷間與陳獻章高弟鄧德昌輩泉石自娛不與世事然赴人之急甚於其私有受誣殺人者未嘗識面聞其冤輒爲雪釋其人致百金謝揮而不受歲侵令家人減食以贖見債負苦累或代償焉有兩田更鬪乙不勝毀甲先隴釋憾甲將訟于官任諭之不聽乃具脯醢往拜其隴躬飾之甲驚曰吾世田更何以當此遂不復訟其厚德類此栖西樵垂四十載山民父視之比卒聞者莫不悲悼所著有心性說解宙山剩言行于世季弟傑

奇行亦隱西樵獨處石室中經旬絕粒無饑色  
身不娶有林逋風嘉靖元年忽出會城徧辭親友登  
越王臺端坐而逝數日顏色如生人皆異之

### 鍾景星

鍾景星字叔輝東莞人少習舉業聞湛若水講學西  
樵遂受學焉久之相從至都下與陳謨郭肇乾相策  
勵終日正襟未嘗少懈如是者數年充然有得其飾  
窮砥行毅如也家最貧然毫不苟取雖往來諸名公  
間終身未嘗有所干人以此益重之晚年養愈冲粹  
喜怒不形未嘗疾言遽色望者知其爲有道士云卒



年七十四幾無以斂邑令喬誥捐貲助之乃克葬焉  
尚書何維栢銘其墓

鄭 昊

鄭昊字祖欽順德人其先漢章得金蒲澗訪其主還  
之者也少力學善屬文文溫醇如其人登嘉靖乙丑  
進士知江陰縣補海鹽縣里甲海塘前令籌策未竟  
昊卒就之民蒙其利遷南戶部主事歷工部郎中出  
守柳州會八砦之役久旱大饑百姓嗷嗷昊殫力晝  
夜八砦平賜金無何卒昊端慤清慎年踰五十始獲  
一第不以日暮爲自植計官六轉歷二千石歸囊無

餘貲督府劉堯誨知其廉命所經郡邑祭賻之

### 劉克正

劉克正字懋一從化人生而穎悟隆慶丁卯舉于鄉  
辛未會試主司奇其文擬魁天下後置第六時論惜  
之既第進士改庶吉士尋授檢討奉命冊封靖江王  
餽遺一無所受修兩朝實錄成賜白金文綺會奔父  
喪南歸哀毀踰節起復抵維揚疾作還次真州而卒  
年僅三十七克正質敏才茂肆力詞賦爲丁士美諸  
大綬輩所推重嘗作越裳白雉賦璀璨華麗世競傳  
之

梁有年

梁有年號惺田廣東順德縣人萬曆甲午鄉試乙未  
會試改庶吉士丁憂辛丑選吏科給事中本年管太  
倉銀庫巡視皇城陞戶科右巡視京營皇城癸卯浙  
江副考時主考爲閩中之高克正較閱精詳甄收多  
名士丙午陞刑科都諫例應內轉請外補得霸州兵  
備陞河南按察使調湖廣按察使壬子陞浙江右布  
政生平素持清肅所至吏畏民懷屹然倚爲保障甲  
寅丁艱未踰年而卒未竟所施士論惜之

區越

殷廷蘭新會人進士正德元年知嘉善少遊白沙之門性慈祥政簡靜得親民體平居無疾言遽色民甚懷之擢戶部主事

殷廷蘭

殷廷蘭廣東人嘉靖癸丑進士授嘉興理刑廉介端嚴不可干以私每聽斷詳審精密未嘗輕出入郡是以無冤獄會署平湖事倭夷卒至僅隔一水時未有城廷蘭令民無走當爲疑兵以却賊於是晝則揚兵夜則列炬舟卒市人聲應若十萬師賊駭遁百姓歡呼相賀廷蘭曰是幸也不可再亟申請爲城以守經

畫措置盡出其力無何以憂去尋卒